



**NOGOMETNI/FUDBALSKI SAVEZ
БОСНЕ И ХЕРЦЕГОВИНЕ**

**KODEKS
O PONAŠANJU ČLANOVA
NOGOMETNE / FUDBALSKE ORGANIZACIJE**

Sarajevo, februar / veljača 2017. godine

Na osnovu člana 35. Statuta Nogometnog/Fudbalskog saveza Bosne i Hercegovine BiH,
Izvršni odbor NS/FS BiH na sjednici održanoj 24.01.2017. godine, donosi s l i j e d e Ć i

KODEKS O PONAŠANJU ČLANOVA NOGOMETNE / FUDBALSKE ORGANIZACIJE

Član 1.

Kodeksom o ponašanju članova nogometne / fudbalske organizacije (u daljem tekstu: Kodeks) regulišu se pravila ponašanja klubova, igrača u klubovima, igrača reprezentativnih selekcija NS/FS BiH, članova stručnih štabova reprezentativnih selekcija NS/FS BiH, sudija, delegata, članova organa i tijela, kao i ostalih nogometnih / fudbalskih radnika u Bosni i Hercegovini.

Putem ovog Kodeksa naglašavaju se osnovna sportska načela u nogometnoj / fudbalskoj organizaciji, a posebno fair-play i korektno ponašanje.

Član 2.

Članovima nogometne / fudbalske organizacije u ovom Kodeksu smatraju se igrači, treneri, članovi (igrači i članovi stručnih štabova) reprezentativnih selekcija NS/FS BiH, predsjednici, direktori i ostali službenici klubova, nogometni / fudbalski suci, delegati, osobe koje rukovode takmičenjem, članovi organa i tijela NS/FS BiH, kao i sve ostale osobe koje učestvuju u radu nogometne / fudbalske organizacije na svim nivoima organizovanja NS/FS BiH.

Član 3.

Članovi nogometne / fudbalske organizacije trebaju se ponašati u skladu sa načelima sportskog ponašanja, koja su zasnovana na uvažavanju sportskog protivnika, gledalaca i nogometne / fudbalske organizacije, zalaganju za punu regularnost takmičenja, suzdržavanju od svih nedopuštenih radnji, afirmaciji i popularizaciji sporta, poštenju i časti, te svim ostalim oblicima ponašanja kojima se promoviše nogomet / fudbal kao sport.

Članovi nogometne / fudbalske organizacije obavezni su voditi računa o svom ugledu i ponašanju u svom javnom i privatnom životu, te su obavezni pridržavati se ovog Kodeksa i u situacijama koje nisu direktno vezane za nogomet / fudbal.

Član 4.

Obaveze članova nogometne / fudbalske organizacije

1. Svi članovi nogometne / fudbalske organizacije

Svi članovi nogometne / fudbalske organizacije posebno trebaju:

1. poštivati načela lojalnosti, integriteta i sportskog odnosa u skladu s načelima fair playa, što posebno uključuje obavezu suzdržavanja od svih aktivnosti koje ugrožavaju integritet NS/FS BiH, njegovih članica i takmičenja, ili narušavaju ugled nogometnom / fudbalskom sportu;
2. suzdržavati se od prihvatanja poklona ili novca ili koristi bilo koje vrste koja se razumno može smatrati prekomjernim;
3. ne smiju prihvatiti mito, što znači da moraju odbiti sve poklone ili druge prednosti koje im se ponude, obećaju ili pošalju, kako bi prekršili svoju obavezu ili se nepošteno ponašali u korist treće stranke;

4. ne smiju davati mito trećoj strani niti smiju poticati druge to učine kako bi stekli prednost za sebe ili treće strane;
5. suzdržati se od pokušaja uticaja na članove organa koji donose odluke u vezi sa takmičenjem, ili druge odluke iz djelokruga rada organa i tijela NS/FS BiH;
6. odmah obavijestiti NS/FS BiH ukoliko im bude ponuđeno mito;
7. u javnim nastupima nije dozvoljeno iznošenje negativnih stavova, vrijeđanja ili klevetanja drugih pripadnika nogometne organizacije, a izjave za sredstva javnog informisanja su dozvoljene samo u skladu sa internim pravilima Saveza koja se odnose na ovu oblast, tj. po odobrenju predsjednika, potpredsjednika ili generalnog sekretara, i u skladu sa aktima koji regulišu pravila komuniciranja;
8. davati sve primjedbe na suđenje, organizaciju utakmice ili rukovodstvo takmičenja samo na način predviđen propisima NS/FS BiH, uključujući i pravo na pokretanje disciplinskog ili žalbenog postupka;
9. ne smiju sudjelovati, neposredno ili putem trećih osoba, u klađenju ili sličnim aktivnostima koje se odnose na utakmice u organizaciji NS/FS BiH i ne smiju imati nikakav, posredan ili neposredan finansijski interes u odnosu na takve aktivnosti;
10. ostati politički neutralni u kontaktima s vladinim institucijama, nacionalnim i međunarodnim organizacijama;
11. ne smiju uvrijediti dignitet osobe ili grupe osoba putem uvredljivih, diskriminacijskih ili klevetničkih riječi ili djela, a u odnosu na nacionalnu, rasnu, kulturnu, vjersku, političku, spolnu ili bilo koju drugu pripadnost;
12. u potpunosti se pridržavati statuta, pravilnika i drugih propisa NS/FS BiH, FIFA-e i UEFA-e;
13. unutar i izvan stadiona ponašati se na način koji pomaže nogometu / fudbalu u dobivanju povećanog poštovanja.

2. Igrači

Igrač treba:

1. Poduzeti sve napore kako bi razvio svoje sportske sposobnosti, u odnosu na znanje, tehniku, taktiku, izdržljivost, itd;
2. Poduzeti maksimalni napor i nastojati tokom utakmice pružiti najbolju moguću igru, čak i kada je njegova ekipa u poziciji kada je željeni rezultat već ostvaren (pobjeda, kvalifikacija itd.);
3. Biti pozitivan primjer mlađim igračima;
4. Izbjegavati sve oblike "anti-nogometa" (gubljenje vremena, itd.);
5. Odbiti uzimanje bilo kojih sredstava koja se smatraju dopingom, kao i kontrolisati i informisati se o načinu uzimanja dopuštenih sredstava i preparata;

6. Poštovati sportske protivnike i njihove navijače;
7. Poštovati Pravila, odredbe i duh igre;
8. Dostojno i u duhu fair-playa prihvataći uspjeh i neuspjeh, pobjedu i poraz;
9. Bez negodovanja prihvati odluke suca, i nakon utakmice ne komentarisati njihove odluke;
10. Izbjegavati riječi ili djela koja bi mogla zavesti suca (npr. simuliranje prekršaja radi dosuđivanja kaznenog udarca);
11. Ponašati se na dostojanstven način prema gledaocima i medijima, bez obzira na rezultat utakmice ili izražene stavove gledalaca ili medija;
12. Insistirati na istini i realnosti prilikom ustupanja informacija.

Igrači članovi reprezentativnih selekcija NS/FS BiH trebaju:

1. Pravovremeno se odazvati se na pripreme i nastup pojedine reprezentacije BiH;
2. Na pripremama i nastupima pridržavati se uputa i naloga za treninge, utakmice, boravak na pripremama, upute o korištenju opreme, upute o prehrani i lijekovima, te drugih uputa izdatih od strane selektora;
3. Davati izjave za javnost, intervjuje za štampu, radio ili televiziju na način da to ne šteti NS/FS BiH-u, niti nogometu / fudbalu u cijelini. Izjave koje se odnose na unutrašnja piatanja NS/FS BiH-a, naročito o treningu, taktici i sl, ili radu selektora ili vodstva NS/FS BiH-a mogu se davati samo uz prethodnu suglasnost NS/FS BiH-a;
4. Ispunjavati, bez novčane ili druge naknade, obaveze u smislu marketinških, sponzorskih i drugih aktivnosti, a posebno:
 - a) učestvovati u svim aktivnostima, nastupima, publikacijama NS/FS BiH-a, u svrhu promocije NS/FS BiH-a, posebno na televiziji, radiju ili štampi, kao i na javnim priredbama, podjeli autograma, odavanjima počasti, i sl. Na takvim aktivnostima igrač treba nositi sportsku opremu i odjeću koju mu na raspolaganje stavlja NS/FS BiH;
 - b) prenijeti prava na upotrebu svog lika na korištenje Savezu, a taj prijenos odnosi se na sve sadašnje i buduće tehničke medije i institucije, uključujući i multimedije (internet i sl.). To naročito vrijedi za fotografije igrača, pojedinačno ili cijele ekipe, osobito u pogledu scena iz utakmica i/ili cijelih utakmica reprezentacije, a u svrhu da Savez može ispuniti svoje obaveze iz sponzorskih ugovora;
5. Poštovati sve odredbe Pravilnika o reprezentacijama NS/FS BiH, kao i druge akte i odluke nadležnih organa NS/FS BiH, UEFA-e i FIFA-e.

3. Treneri

Trener treba:

1. Promovisati istinske vrijednosti nogometnog / fudbalskog sporta kako bi se pridobila podrška i entuzijazam mladih ljudi - navijača i igrača;
2. Razvijati svoje profesionalno znanje i poboljšavati ga, proučavajući rezultate naučnih istraživanja, praktičnog iskustva i profesionalnih savjeta;

3. Razmjenjivati svoje profesionalno znanje s kolegama, naročito onima mlađe generacije i posebno kada za to bude zatražen (npr. profesionalne konferencije, članci itd);
4. Štititi nogomet od negativnih utjecaja;
5. Poduzeti sve napore u smjeru razvijanja (sportskog, tehničkog, taktičkog itd.) i putem dozvoljenih sredstava ostvarivati najbolje rezultate svoje ekipe;
6. Insistirati da igrači razumiju i poštuju načela sportskog ponašanja;
7. Poštovati sportske protivnike i njihove navijače;
8. Ponašati se na dostojanstven način prema gledaocima i medijima, bez obzira na rezultat Utakmice, ili izražavanja stavova gledalaca ili medija;
9. Strogo insistirati na istini i realnosti prilikom ustupanja informacija;
10. Bez negodovanja prihvpati odluke suca, i nakon utakmice ne komentarisati njihove odluke;
11. Izbjegavati metode treniranja koje uključuju dugoročne rizike na zdravlje ili fizički razvoj;
12. Osigurati mlađim igračima sportsko iskustvo koje će ih ohrabriti da doživotno budu vezani uz fizičke aktivnosti;
13. Ponuditi mladoj osobi i njegovoj porodici što je moguće više informacija, kako bi bili svjesni potencijalnih rizika vezanih uz postizanje maksimalnog nivoa nastupa;
14. U kontaktu s roditeljima mlađih igrača ostvariti dobar odnos i saradnju.

4. Sudije

Sudija treba:

1. Suditi prema Pravilima nogometne igre, odlukama Međunarodnog nogometnog saveza BOARD-a i propisima NS/FS BiH-a;
2. Poduzeti sve napore kako bi osigurao da je fizički i psihički spremna;
3. Biti staložen i odlučan i oduprijeti se svim utjecajima koji proizlaze iz negodovanja igrača, službenih osoba klubova ili gledatelja;
4. U svako vrijeme biti pošten i potpuno nepristrasan, bez obzira na ekipe, igrače ili službene osobe koji su uključeni u utakmicu;
5. Odbiti delegiranje na utakmici ukoliko nije fizički ili psihički spremna suditi utakmicu (zbog bolesti, povrede ili obiteljskih razloga);
6. Odbiti sve ponude pretjerane gostoljubivosti (ručkovi, noćenja, pokloni, i sl);
7. Štititi igrače od grube igre;
8. Pokazati dužno poštovanje u svojim kontaktima sa igračima;

9. Detaljno i realno ispuniti izvještaj o utakmici;
10. Suzdržati se od javnog izražavanja svih kritika glavnih i pomoćnih sudaca, ili bilo kakvih davanja izjava u medijima, a koje se odnose na utakmicu;
11. Pomagati u razvoju mladih glavnih i pomoćnih sudaca.

5. Dužnosnici i zaposlenici nogometnih / fudbalskih saveza i klubova

Dužnosnici i zaposlenici nogometnih / fudbalskih saveza i klubova trebaju:

1. Odbiti sve nedopuštene ili nesportske pokušaje igrača, trenera, ostalih službenika itd. svoje ekipe (npr. korištenje nedozvoljenih lijekova ili supstanci, taktičke upute trenera kojima bi se ozlijedili igrači protivničke momčadi, i sl);
2. Promovisati etička načela;
3. Osigurati ispunjavanje obveza koje proizlaze iz ugovora s igračima, dobavljačima i drugim subjektima;
4. Odgovorno se ponašati prema svojim dužnostima i obavezama;
5. Djelovati i u javnim istupima ponašati se afirmativno prema nogometu / fudbalu općenito, sportskim protivnicima i nogometnim / fudbalskim sucima, te osuđivati negativne pojave kao što su diskriminacija, navijačko nasilje i druga zabranjena i nepoželjna ponašanja;

Član 5.

Povreda odredbi ovog Kodeksa predstavlja disciplinski prekršaj regulisan Disciplinskim pravilnikom NS/FS BiH.

Osim individualne odgovornosti svakog člana nogometne / fudbalske organizacije, klubovi su odgovorni za organizaciju utakmice te za incidente bilo koje prirode koji se dogode uoči, za vrijeme ili poslije utakmice.

Ukoliko članovi nogometne / fudbalske organizacije koji volonterski obavljaju svoju dužnost učine prekršaj za koji je predviđena i novčana kazna, ista se izriče klubu ili drugom nogometnom / fudbalskom subjektu, koji je prekršitelj predstavljao u trenutku počinjenog prekršaja.

Član 6.

Kodeks stupa na snagu danom objave u Službenom glasniku NS/FS BiH.

Danom stupanja na snagu ovog Kodeksa prestaje važiti Pravilnik ponašanja članova nogometne / fudbalske organizacije od 12.04.2011. godine, kao i Kodeks o ponašanju od 02.09.2014. godine.

**PREDSJEDNIK
Elvedin Begić, s.r.**